

摘藻堂四庫全書薈要

集部

欽定四庫全書薈要卷一萬八千八百四十八

集部

御定佩文齋詠物詩選卷二百二十六

圃類

五言古

觀圃人藝植

宋鮑照

善賈笑蠶漁巧宦賤農牧遠養遍關市深利窮海陸乘
輶實金羈當壚信珠服居無逸身伎安得坐梁肉徒承
屬生幸政緩吏平睦春畦及耘藝秋場早芟築澤闕旣

繁高山營又登熟抱鋪壟上餐結茅野中宿空織已尚
淳寧知俗翻覆

齋中雜興

宋 陸 游

荷鋤草堂東藝花二百株春風一朝來白白兼朱朱南
列紅薇屏北界綠芋區偃蹇雙松老森聳萬竹臞餘地
不忍第插援引瓠壺何當拂東絹畫作山園圖

後圃散策

宋 楊萬里

花徑雨後涼樹聲風外戰杖履頓輕鬆兒女同行散少

者前已失老者後成倦隔林吹笑語相聞如對面明明
去人近眇眇彌步遠松杉滿地影一瞬忽不見仰觀紫
日輪偶度白雲片佳處畱再來前山未須徧

月下觀畦丁灌園

金雷淵

邨居鄰老圃喘汗憫夏畦輓轡健晚涼月輪轉天蹊剡
剡金融溝涓涓冰泮溪黃萎漸蘇息綠潤俄萎迷生意
續夜氣甘滋浹新莢風露觸處香河漢望中低野人無
遠謀且喜豐食鮭雖媿下帷董稍悟養生嵇歸懷自浩

然流光挹平西

灌畦

元岑安卿

灌畦起清晨汲水甘自勞微露濕裳屐涼風吹鬢毛
緬懷漢陰丈東陵亦其曹顧余何爲者佚豫敢自驕
日午得偃息讀書志彌高年饑見秔稻萬民免煎熬
寄跡天壤間于焉遂逍遙

治圃

元戴良

三春豐雨澤晨興觀我畦嘉蔬有餘滋草盛相與齊
戮

力治荒穢指景光已西好月因時來歸路杳然迷暮鳥
尋舊林晚獸遵故蹊我亦息微勞去去安吾棲

其二

長夏罕人事齋居有餘閒北窗多悴物且遂灌我園攢
根既舒達積葉亦蔥芊瓜瓞繞畦長新葵應節鮮抱甕
一回視生意盈化先在我豈不勞即境多所歡悠悠千
載間樊生信為賢

新治圃成

明
袁凱

隙壤所自治翦剗去龍茸幸無焚穢雜況此清泉涌灌
滋竟朝夕勾萌各森聳青蒲已彌澤黃瓜方卧壟春菁
向堪把秋梨日應重自余通宦籍職事勞紛冗祿食雖
云美私心恒自恐歸來得蕭茆采擷聊自奉且遂丘園
樂永謝承明寵

命僮

明
胡翰

今晨雨新歇日出東南隅草樹有佳色當軒散紛敷歡
言命僮僕治我園中蔬幸此琴冊暇且復一荷鋤雖有

黽勉勞良足具中廚但恐惡草長不治成荒蕪世事每如此豈敢忘勤劬

西園

明
王守仁

方園不盈畝蔬卉頗成列分谿免甃灌補籬防豕蹄蕪草稍焚薙清雨夜來歇濯濯新葉敷熒熒夜花發放鋤息重陰舊書漫披閱倦枕竹下石醒望松間月起來步且謠晚酌簷間設酣時藉草眠忘與鄰翁別

五言律

南山下與老圃期種瓜

唐 孟浩然

樵牧南山近林閭北郭賒先人畱素業老圃作鄰家不
種千株橘惟資五色瓜邵平能就我開徑剪蓬麻

佐還山後寄

唐 杜甫

幾道泉澆圃交橫落幔坡歲蕤秋葉少隱映野雲多隔
沼連香茝通林帶女蘿甚聞霜薤白重惠意如何

園

杜甫

仲夏多流水清晨向小園碧谿搖艇閣朱果爛枝繁始

爲江山靜終防市井喧
畦蔬繞茅屋自足媮盤飧

種圃

宋張耒

僦舍亦爲圃從人笑我癡
自求佳草木仍插小藩籬
吾事正如此人生聊自怡
霜松未及尺獨我見竒姿

連日治圃至山亭又作五字

宋陸游

好竹千竿翠新泉一勺冰
殘蕪襯落日老木上寒藤
細磴歌難過危欄曲可憑
歸時忽已暮點點數漁燈

小畦

宋戴昺

小畦尋丈許鑿壁置柴扉雨後菜蟲盡秋來花蝶稀插
籬新種菊抱甕已忘機俗客忽相訪妨人洗布衣

理蔬

宋

楊萬里

小摘吾猶惜頻來徑自成青蟲捕仍有綠葉蠹還生貧
裏猶存竈霜餘正可羹窺園未妨學抱甕更須營

菜圃

楊萬里

此圃何其窄于儂已自華看人澆白菜分水及黃花霜
熟天殊暖風微旆亦斜笑摩桃竹杖何日拄還家

治圃雜書

元方回

天地一間人園林數畝春認苗諳藥性養果護花身社
友同蔬飯鄰兒笑野巾空庭維老馬不出動經旬

其二

花有如罌粟能同橘不遷茄藤宜硬地豆莢惡肥田元
總齊民術夷吾土物篇園丁初未讀口訣自相傳

畦樂園

明劉永之

郭南抱甕者久與世情疎砌長龍鬚草林開燕尾渠轆

轆花下轉蒿苳雨中鋤蔗熟能相寄酬君薤葉書

題老圃卷

明王紱

桑榆宜晚境築圃近茅堂鑿沼分流水編籬補壞牆雨
晴瓜蔓綠風暖菜花香客過餐雞黍邛醪剪韭嘗

觀詩

明葛一龍

計戶各成區開塍直到湖桔槔旋老牯簞食走童烏綠
自歌邊起雨爲勞者蘇穰穰從此日飢可一年無

七言律

邨舍

唐許渾

自剪春莎織雨衣
南邨烟火是柴扉
萊妻早報蒸藜熟
童子遙迎種豆歸
魚下碧潭當鏡躍
鳥還青嶂拂屏飛
花時未免人來往
欲買嚴光舊釣磯

其二

向平多累自歸難
一日身閒一日安
山徑有雲收獵網
水門無月挂漁竿
花間酒氣春風遠
竹裏棋聲夜雨寒
三頃水田秋更熟
北窗誰拂舊塵冠

偶圃小園因題

宋 王禹偁

偶營菜圃爲盤飧
淮瀆祠前水北邨
泉響靜連衙鼓響
柴門深近子城門
濛濛細雨春蔬甲
疊疊寒流老樹根
從此商於地圖上
畫工添個舍人園

課畦丁灌園

宋 范浚

連筒隔竹度流泉
約束畦丁灌小園
拔薤自須還種白
刈葵輒莫苦傷根
瓜疇准擬狸頭大
草徑隄防馬齒繁
努力荷鋤當給酒
無令菜把乏朝昏

小圃獨酌

宋

陸游

少時裘馬競豪華，豈料今爲老圃家。
數點霏微社公雨，兩叢閒淡女郎花。
詩成枕上常難記，酒滿街頭却易賒。
自笑邇來能用短，只將獨醉作生涯。

蒲橋寓居庭有刻方石而實以土者，小孫子藝
花窠菜本，其中戲名幼圃。

宋

楊萬里

寓舍中庭劣半弓，燕泥爲圃石爲墉。
瑞香萱草一兩本，蔥葉薺苗三四叢。
穉子落成小金谷，蝸牛卜築別珠宮。

也思日涉隨兒戲一徑惟看蟻得通

爲圃

宋

劉克莊

屋邊廢地稍平治妝點風光要自怡
愛敬古梅如宿士護持新笋似嬰兒
花窠易買姑添價亭子難營且築基
老矣四科無入處旋鋤小圃學樊遲

即事

劉克莊

買得荒郊五畝餘旋營花木置琴書
柳能樊圃猶須種蘭縱當門亦不鋤
無力改牆姑覆草多方存井要澆蔬

區區才志聊如此誰謂先生廣且疏

其二

目爲詩客不勝慙
喚作園翁定自堪
抱甕荷鋤非鄙事
栽花移竹似清談
野人只識羹芹美
相國安知食笋甘
晚覺齊民書最要
惜無幽士肯同參

五言絕句

城西書事

宋韓維

疏畦繞茅屋
林下轆轤遲
霜蔓已除架
風瓢空挂籬

蔬圃

宋 朱子

花柳遶宅茂先生在郊居下帷良已苦時作帶經鋤

行圃

宋 楊萬里

摘杞搜枯梗攀花脫脆包蝶成新樣粉柳送隔城梢

課園夫

宋 白玉蟾

已屬畦丁了都將菜甲耘數時稽食籍醯芥又羹芹

入圃

明 李瑋

入圃細雨餘荷鋤情不惡山妻愛木棉慙余種紅藥

七言絕句

和沈太博小圃偶作

宋 趙抃

日烘薄霧開桑陌
風冒遊絲著柳條
語燕啼鶯自撩亂
驚人殘夢是春朝

春日田園雜興

宋 范成大

種園得果僅償勞
不奈兒童鳥雀搔
已插棘針樊笋徑
更鋪漁網蓋櫻桃

行圃

宋 楊萬里

薤本新痕割復齊
豆苗初葉合仍離
鶯聲正好還飛去
不爲詩人更許時

初秋行圃

楊萬里

花梢飛下兩鳴鳩
欲住還行行復留
拾得來禽吞不得
啄來啄去竟成休

雜詩

金王 礪

南畝東臯春務時
田家候雨罷耕犁
却汲井泉澆藥圃
更疏陂水灌麻畦

山居詩

元僧清珙

鑊頭添鐵屋頭懸健即鋤雲倦即眠紅日正中黃獨熟
甘香不在火爐邊

御定佩文齋詠物詩選卷一百二十六

欽定四庫全書薈要卷一萬八千八百四十九

集部

御定佩文齋詠物詩選卷二百二十七

樵類

五言古

樵父詞

唐儲光義

山北饒朽木山南多枯枝
枯枝作採薪爨室私自詰
朝礪斧尋視暮行歌歸先
雪隱薜荔迎暄卧茅茨清
澗日濯足喬林時曝衣終
年登險阻不復憂安危蕩
漾與

神遊莫知是與非

樵人十詠

錄六

唐陸龜蒙

樵谿

山高谿且深蒼蒼但羣木抽條欲千尺衆亦疑樸樾一朝蒙剪伐萬古辭林麓若遇燎圓穹微煙出雲族

樵家

草木黃落時比鄰見相喜門當清澗盡屋在寒雲裏山棚日纔下野竈煙初起所謂順天民唐堯亦如此

樵子

生在蒼崖邊能諳白雲養纔穿遠林去已在孤峯上新
和野花束步帶山詞唱日暮不歸來柴扉有人望

樵擔

輕無斗儲價重則筋力絕欲下半巖時憂襟兩如結風
高勢還却雪厚疑中折負荷誠獨難移之贈來哲

樵風

朝隨早潮去暮帶殘陽返向背得清飈相隨無近遠採

山一何遲服道常苦蹇仙術信能爲年華未將晚

樵歌

縱調爲野吟徐徐下雲磴固知負樵樂不減援琴興出
林方自轉隔水猶相應但取天壤情何求郢人稱

奉和樵人十詠

錄四

唐

皮日休

樵谿

何時有此谿應便生幽木橡實養山禽藤花蒙澗鹿不
止產蒸薪願當歌棫樸君知天意無以此安吾族

樵家

空山最深處太古兩三家雲蘿共夙世猿鳥同生涯
衣服濯春泉盤餐烹野花居茲老復老不解歎年華

樵徑

蒙籠中一徑繞在千峯裏歇處遇松根危中值石齒
花穿泉衣落雲拂芒鞋起自古行此途不聞顛與墜

樵風

野船渡樵客來往平波中縱橫清飈吹旦暮歸期同蘋

花惹衣白蓮影涵薪紅吾意請封爾直作鏡湖公

山中

元于石

我家萬山中日日採樵去捫蘿上層巔苔滑不留屨落
日負樵歸雲深失歸路誰家犬吠聲聲在雲深處

下嶺樵歌

明許繼

石磴綠蒼蒼負薪下層峭歌聲相應發山木閃殘照近
驚幽谷響遠答清猿嘯款乃江上音煙波豈同調

題畫

明鍾泰

千峯落日陰閃閃鴉飛盡隔樹暗鳴泉蒼茫路難認何處遠歸樵山花紅插鬢

訪樵者

明
孫一元

遠尋山中樵不識山中路隔林伐木聲遙憶林深處不晤竟空歸日墮西陵樹

贈山陰陳海樵

明
王問

十年製一斧三日採一薪白石自堪煮赤松爲爾鄰入市常問卜移家非避秦獨乘遼東鶴高揖謝時人

觀束薪

王 問

山椒露未晞松約多樛枝林疎古苔出錯愕雲根傲坐
此觀捆載落日樵腹飢歸爨秋籬下薪濕烟火遲

七言古 附長短句

樵客吟

唐 張 籍

山上採樵選枯樹深處樵多出辛苦秋來野火燒櫟林
枝柯已枯堪採取斧聲坎坎在幽谷採得齊稍青葛束
日西待伴同下山竹擔彎彎向身曲共知路傍多虎穴

未出深林不敢歇
邨西地暗狐兔鳴
稚子叫時相應聲
採樵客莫採松與柏
松柏生枝直且堅
與君作屋成家室

樵歌

宋鄭震

上山劖山山丁登下山嵌山山
稜層秋殘日暮歸來晚
茅檐洗脚月又明明朝早入芙蓉城

醉樵歌

明張簡

東吳市中逢醉樵
鐵冠歌側髮飄蕭
兩肩屹屹何所負

青松一枝懸酒瓢自言華蓋峯頭住足跡踏徧人間路
學書學劍總不成惟有飲酒得真趣管樂本是王霸才
松喬自有煙霞具手持崑岡白玉斧曾向月裏斫桂樹
月裏仙人不我嗔特令下飲洞庭春興來一吸海水盡
却把珊瑚樵作薪醒時邂逅逢王質石上看暮黃鵠立
斧柯爛盡不成仙不如一醉三千日于今老去名空在
處處題詩償酒債淋漓醉墨落人間夜夜風雷起光怪

贈醉樵

明高啟

川釣已遭獵野耕終改圖不如山中樵醉卧誰得呼採
山不採松松花可爲酒酒熟誰共斟木客爲我友木客
已去空石牀舉杯向月邀吳剛借汝快斧斫大桂要令
四海增清光林風吹髮寒擁耳獨枕空尊碧巖裏此時
忘却負薪歸猛虎一聲驚不起世間萬事如浮煙看基
何必逢神仙青松化石鶴未返酒醒又是三千年

五言律

樵者

唐
崔塗

入山行採薇間剪蕙爲衣避世嫌山淺逢人說姓稀有
時還獨醉何處掩衡扉莫看碁終局谿風晚待歸

六言律

冬樵

明楊慎

城闕軟紅塵遠林巒空翠嵐深丁丁鳥驚斧重霏霏雪
壓檐沈沙明東郭履跡谷響南華足音歸去自換邨酒
不須解却貂金

七言律

雪樵

元龔璠

伊川門下已齊腰，清苦誰如雪裏樵。
浩蕩山林行靡靡，低迷蓑笠影飄飄。
枯梢一夜號寒墮，野菜尋春待凍消。
炙手故應猶可熱，高人塵甑儘無聊。

樵

明朱之蕃

行歌伐木隱林中，平楚高原四望通。
愛踏春山紫碧草，醉眠秋壑舞丹楓。
唯畱松柏團成蓋，不許荊榛競作叢。
半嶺夕陽歸路穩，乘風破浪爲誰雄。

五言絕句

樵

金李俊民

雲外山將遍人間日易斜不知棊換世柯爛未還家

樵歌貽盧子明

明黃克晦

採薪入深林唱歌出幽谷樵歌非無辭辭古不可讀

六言絕句

樵

明黎擴

窈窕徑穿林下丁丁斧徹雲間耳慣猿驚鶴怨跡窮紅

樹青山

七言絕句

樵翁

唐 蔣吉

獨入深山信脚行，慣當羆虎不曾驚。
路傍花發無心看，惟見枯枝刮眼明。

樵叟

唐 僧貫休

樵父貌飢帶塵土，自言一生苦寒苦。
擔頭擔箇赤瓷罍，斜陽獨立朦朧塢。

樵者

宋 歐陽修

雲際依依認舊林，斷崖荒磴路難尋。
西山望見朝來雨，南澗歸時渡處深。

歲晚書事

宋 劉克莊

歲晚郊居苦寂寥，日高鹽路去城遙。
深深榕徑苔牆裏，忽有銀釵叫賣樵。

次松風閣韻

宋 裘萬頃

白雲殊不作俗態，流水更似知人心。
谿邊濯足谿上坐。

樵唱一聲秋滿林

餘杭樵歌

宋 謝翱

樵斧丁丁響翠微
頽肩半脫汗身衣
因來避雨巖前洞
裹得山蜂和蜜歸

九曲樵歌

元 曹文晦

瓊闕我栽接太清
五雲洞口問長生
欲知嶺上無窮景
聽取樵歌四五聲

寄破山樵者李超無

明 尹嘉賓

結隱深隨麋鹿羣上方鐘磬斷知聞空山歲晚多冰雪
若個峯頭踏凍雲

御定佩文齋詠物詩選卷二百二十七



總校官庶吉士臣侍朝

校對官編修臣許兆椿

謄錄貢生臣王嘉稷

欽定四庫全書薈要

集部

御定詠物詩選卷二百

二十八至
三十一

詳校官原任主事臣李斯咏

欽定四庫全書薈要卷一萬八千八百五十

集部

御定佩文齋詠物詩選卷二百二十八

漁類



四言古

酒會詩

魏嵇康

斂絃散絲遊釣九淵重沅千仞惑餌者懸犴歟莊老棲
遲永年實惟龍化蕩志浩然

江郊

宋蘇軾

江郊葱朧雲水蒨絢碕岸斗入洄潭輪轉先生悅之布
席閒燕初日下照潛鱗俯見意釣忘魚樂此竿線優哉
悠哉玩物之變

五言古

釣竿行

魏
文帝

東越河濟水遙望大海涯釣竿何珊珊魚尾何篸篸行
路之好者芳餌欲何為

釣竿

梁沈約

桂舟既容與綠浦復回紆輕絲動弱芰微楫起單鳧叩
舷忘日暮卒歲以為娛

觀釣

陳陰鏗

澄江息晚浪釣侶柅輕舟絲垂遙濺水餌下暗通流歌
聲時斷續櫂影乍橫浮寄言濯纓者滄浪終滯遊

釣竿篇

隋李巨仁

潺湲面江海滉漾矚波瀾不惜黃金餌唯憐翡翠竿斜
綸控急水定櫂下飛湍潭迴風來易川長霧歇難寄言

朝市客滄浪余自安

漁父詞

唐 儲光義

澤魚好鳴水谿魚好上
沅漁梁不得意下渚潛垂釣
亂荇時礙楫新蘆復隱舟
靜言念終始安坐看沈浮
素髮隨風揚遠心與雲遊
逆浪還極浦信潮下滄州
非為徇形役所樂在行休

釣魚灣

儲光義

垂釣綠灣春春深杏花亂
潭清疑水淺荷動知魚散
日

暮待情人維舟綠楊岸

漁父歌

唐
李 頎

白首何老人
蓑笠蔽其身
避世長不仕
釣魚清江濱
浦沙明濯足
山月靜垂綸
寓宿湍與瀨
行歌秋復春
持竿湘岸竹
蕪火蘆洲新
綠水飯香稻
青荷包紫鱗
於中還自樂
所欲全吾真
而笑獨醒者
臨流多苦辛

大回中

唐
元 結

樊水欲東流
大江又北來
樊山當其南
此中為大回
回

中魚好遊回中多釣舟漫欲作漁人終焉無所求

藍田谿與漁者宿

唐錢起

獨遊屢忘歸況此隱淪處濯髮清冷泉月明不能去更
憐垂綸叟靜若沙上鷺一論白雲心千里滄洲趣蘆中
夜火盡浦口秋山曙歎息分枝禽何時更相遇

江中晚釣寄荆南一二相識

唐劉長卿

楚郭微雨收荆門遙在目漾舟水雲裏日暮春江綠霽
華靜洲渚暝色連松竹月出波上時人歸渡頭宿一身

已無累萬事更何欲漁父自夷猶白鷗不羈束既憐滄
浪水復愛滄浪曲不見眼中人相思心斷續

漁具詩

唐
陸龜蒙

網

大罟網目繁空江波浪黑沈沈到波底恰共波同色牽
時萬鬢入已有千鈞力尚悔不橫流恐他人更得

罩

左手揭圓罟輕撓美舟子不知潛鱗處但去籠煙水時

穿紫萍破忽值朱衣起

松江有朱衣鮒

貴得不貴名敢論魴與

鯉

蜀

有意烹小鮮乘流駐孤棹雖然煩取捨未肯求津要多
為蝦蜆誤已分鵠鷁笑寄語龍伯人荒唐不同調

釣筒

短短截筠光悠悠卧江色蓬差櫓相應雨慢煙交織須
臾中芳餌迅疾如飛翼彼竭我還浮君看不爭得

釣車

谿上持隻輪谿邊指茅屋間乘風水便敢議朱丹轂高
多倚衡懼下有折軸速曷若載逍遙歸來卧雲族

魚梁

能編似雲薄橫絕清川口缺處欲隨波波中先置筍接
身入籠檻自古難飛走盡日水濱吟殷勤謝漁叟

叉魚

春谿正含綠良夜才參半持矛若羽輕列燭如星爛傷

鱗跳密藻碎首沈遙岸盡族染東流傍人作佳翫

鳴榔

水淺荇藻澀鉤罩無所及鏗如木鐸音勢若金鉦急敲
之就深處用以資俯拾搜羅爾甚微遁去將何入

滬

萬植禦洪波森然倒林薄千顚咽雲上過半隨潮落其
間風信背更值雷聲惡天道亦哀多吾將移海若

苓箸

誰謂苓箸小我謂苓箸大盛魚自足
飡寘譬能為害時
將刷蘋浪又取懸藤帶不及腰上金
何勞問著蔡

和襲美添詠漁具

陸龜蒙

漁菴

結茅次煙水用以資嘯傲豈謂釣家流
忽同禪室號閒
憑山叟占晚有谿禽嫪華屋莫相非
各隨吾所好

釣磯

揀得白雲根秋潮未曾沒坡陀坐黿背
散漫垂龍髮持

竿從掩霧置酒復待月即此放神情何勞適吳越

蓊笠

朝携下楓浦晚戴出煙艇冒雪或平檐聽泉時仄頂
移靄然色波寫危如影不識九衢塵終年居下洞

背蓬

敏手擘江筠隨身織煙殼沙禽固不知釣伴猶初覺
從翠微拂靜唱滄浪濯見說方山潭漁童盡能學

和陸魯望漁具詩

錄九

唐皮日休

網

晚掛谿上網映空如霧縠間來發其機旋旋沈平綠下
處若煙雨牽時似崖谷必若遇鯢鮪從教通一目

罩

芒鞋下葑中步步沈輕罩既為菱浪颭亦被蓮泥膠人
立獨無聲魚煩似相抄滿手搗霜鱗思歸舉輕棹

罟

煙雨晚來好東塘下罟去網小正星藕舟輕欲騰翥誰

知荇深後恰值魚多處
浦口更有人停撓一延佇

釣筒

籠籊截數尺標置能幽絕
從浮笠澤煙任卧桐江月
絲隨碧波漫餌逐清灘
發好是趁筒時秋聲正清越

釣車

得樂湖海志不厭華輶
小月中拋一聲驚起灘上鳥
心將潭底測手把波文裊
何處覓奔車平波今渺渺

魚梁

波際挿翠筠離離似清蘓遊鱗到谿口入此無逃所斜
臨楊柳津靜下鷗鷁侶編此欲何之終焉富春渚

鳴榔

盡日平湖上鳴榔仍動槳丁丁入波心澄徹和清響鷺
聽獨寂寞魚驚昧來往盡水無所逃川中有鉤黨

舴艋

濶處只三尺脩然足吾事低篷掛釣車枯蚌盛魚餌只
好携橈坐惟堪蓋蓑睡若遣遂平生舴艋不如是

簦簞

朝空簦簞去暮實簦簞歸歸來倒却魚掛在幽窓扉但
聞蝦蜺氣欲生蘋藻衣十年佩此處煙雨空霏霏

添詠漁具

錄二

皮日休

漁菴

菴中只方丈恰稱幽人住枕上悉魚經門前空釣具東
竿時倚壁曬網還侵戶上洞有揚顒須留往來路

窮笠

圓似寫月魄輕如織煙翠泔泔向上雨不亂窺魚思攜
來沙日微挂處江風起縱戴二梁冠終身不忘爾

漁人

唐
蘇拯

垂竿朝與暮披蓑卧橫楫不問清平時日樂滄波業長
畏不得閒幾度避遊畋當笑釣臺上逃名名却傳

漁家傲

宋
晁補之

漁家人言傲城市未曾到生理自江湖那知城市道晴
日七八船熙然在清川但見笑相屬不省歌何曲忽然

四散歸遠處滄洲微或云後車載藏去無復在至老不
曲躬羊裘行澤中

石門漁舍

宋薛季宣

漁家在何許躊駁巖下石花樹幾株芳湖山數峰碧窈
樽亭遂古雙闕天自闢錦繡入茨舍藤蘿封笙柵吾為
江上遊形苦世間役心馳定沙步舟行過檐隙浪翁底
鐫銘太尉此居宅豈若斯人徒風雲相主客

秋江釣月

元程鉅夫

荷蓑非避世持竿不求賞
夙抱江海心寧為利名鞅
天明紫煙裏日暮清波上
四顧無人知孤舟自來往

秋江釣月

元范梈

秋江明似鏡月色靜更好
之子罷琴來蘿徑初尚早
衆峰更滅沒橫笛隔幽島
我船爾棹歌絲綸蕩浮藻
潛魚却寒餌宿雁起夜縞
離離不可招白露下煙草
高風桐廬士駿業渭川老
同是釣魚人那應不同道
把酒酌清輝如何答穹昊

過高郵射陽湖雜詠

元薩都拉

大冒一丈濶小舟一葉輕相傳子與孫終古無人爭

漁父曲

元葉顥

雨過暮雲收江空涼月出輕蓑獨釣翁一曲秋風笛宿
鷺忽驚飛點破煙波碧

釣磯

明袁凱

白日自團團春流亦漾漾閒漚雨邊至輕絲風外颺既
寡羨魚情還聞濯纓唱緬彼磻上翁投竿復何向

秋江漁唱

明
高棟

大川饒數畧淺瀆無吞舟日暮收我綸唱歌度中流歌
長入空闊兩岸江聲秋斷續和鳴榔搖颺隨狎鷗曲終
人不見雲水空悠悠

漁釣

明
祝允明

幸非城市住不舍煙波宅白鳥麗金沙蒼葦繞黃石涼
陰澗木青平遠水天碧梁寒魚盡落稻晚蠡猶瘠脩綸
倚簦簪敗笠蓋襪漉酒自易醉楓根忽終夕

寒江釣雪

明周復俊

嵐雲凍不飛，江水明素練。
千林冥若空，遙峰隱還見。
漁歌巖下起，落日聲猶轉。

七言古

附長短句

漁父

唐岑參

扁舟滄浪叟，心與滄浪清。
不自道鄉里，無人知姓名。
朝從灘上飯，暮向蘆中宿。
歌竟還復歌，手持一竿竹。
竿頭釣絲長，丈餘鼓棹乘流無。
定居世人那得識，深意此翁

取適非取魚

漁父歌

唐
張志和

西塞山邊白鷺飛
桃花流水鱖魚肥
青箬笠綠蓑衣
斜風細雨不須歸

其二

松江鱖舍主人歡
菰飯莼羹亦共餐
楓葉落荻花乾
醉宿漁舟不覺寒

贈湘南漁父

唐
劉長卿

問君何所適暮暮逢煙水獨與不繫舟往來楚雲裏釣
魚非一歲終日只如此日落江清桂檝遲纖鱗百尺深
可窺沈釣垂餌不在得白首滄浪空自知

漁翁

唐
柳宗元

漁翁夜傍西巖宿曉汲清湘然楚竹煙消日出不見人
欸乃一聲山水綠迴看天際下中流巖上無心雲相逐

清江行

宋
劉子翬

漁翁一棹老清波稚子學語能漁歌日暮沙頭寒蕪竹

雨餘船角亂堆蓑，鬻殘小鮮仍自鱸。
湖海茫茫醉鄉內，夜闌酒渴漱寒流。
月照蘆花上篷背。

分題得漁邨晚照

宋徐照

漁師得魚繞谿賣，小船橫繫柴門外。
出門老嫗喚鷄犬，收斂蓑衣屋頭曬。
賣魚得酒又得錢，歸來醉倒地上眠。
小兒啾啾問煮米，白鷗飛去蘆花煙。

漁父詞

金完顏璫

楊柳風前白版扉，荷花雨裏綠蓑衣。
紅稻美，錦鱗肥。漁

笛間拈月下吹

其二

釣得魚來卧看書
船頭橫置酒葫蘆
煙際柳雨中蒲乞
與人間作畫圖

漁翁圖

元
程鉅夫

漁翁牽纜漁婦紡
膝上兒看掉車響
谿南谿北趁冬晴
水急船多欠新網
祝兒休啼手正忙
網成得魚如汝長

漁父

元
揭傒斯

夫前撒網如車輪婦後搖櫓青衣裙全家託命煙波裏
扁舟為屋鷗為鄰生男已解安貧賤生女已得供炊爨
天生網罟作田園不教衣食看人面男大還娶敵家女
女大還作敵家婦朝朝骨肉在眼前年年生計大江邊
更願官中減征賦有錢沽酒供醉眠雖無餘羨無不足
何用世上千鍾祿

右丞春谿捕魚

元
吳鎮

前灘罾兮後灘網魚兮魚兮何所往桃花錦浪綠楊邨

浦漱忽聞漁笛響我行笠澤熟此圖頓起桃源鷄犬想
不如歸向茅屋底老瓦盆中醉春釀

王摩詰春谿捕魚圖

元黃公望

春江水綠春雨初好山對面青芙蓉漁舟兩兩渡江去
白頭老漁爭捕魚操篙提網相兩兩慎勿江心輕舉網
風雷昨夜過禹門桃花浪暖魚龍長我識扁舟垂釣人
舊家江南紅葉邨賣魚買酒醉明月貪夫徇利徒紛紜
世上閒愁生不識江草江花俱自適歸來一笛杏花風

亂雲飛散長天碧

漁莊

元 鄭元祐

濠上春晴花朵朵施周強知魚與我爭如顧循讀書倦
馭沓浪花宵鼓柁船頭列炬船尾唱繩擲如雲翻水上
并刀斫雪鱸縷飛拍拍茅柴薦新釀莊上東風柳欲綿
鯉魚吹浪迎歸船由來名教有樂地看書却掃消殘年

漁莊

元 于立

二月春水生三月春波濶東風揚柳花江上魚吹沫放

船直入雲水鄉蘆荻怒芽如指長船頭濯足歌滄浪
蘭杜吹作春風香得魚歸來三尺強有酒在壺琴在牀長
安市上人如蟻十丈紅塵埋馬耳漁莊之人百不理醉
歌長在漁莊裏

漁邨夕照

明
宣宗

岳陽城頭望湘浦芳草垂楊迷古渡晴嵐霏白夕陽紅
渺渺江邨天欲暮漁家茅屋住汀洲罷釣歸來穩繫舟
自念生涯在網罟臨風高掛向船頭出水鮮鱗雜紫鱗

鑪頭有酒還堪買東鄰西舍當此時歡笑聲餘歌款乃
豚魚吹浪白連天隔江賈客促歸船餘光遠映雙鳬外
殘影半落孤鴻邊湖上高樓雲外起下瞰湖湘千百里
憑高一望楚天低雲樹蒼蒼暮山紫

釣竿

明 劉基

斫竹作釣竿抽繭作釣絲滄洲日暖波連漪綠蒲茸茸
柳葉垂鈎纖餌香魚不知石鱗激水谿毛動玉燕迴翔
竿尾重大魚入饌腮頰紅小魚却放淵法中更祝小魚

知我意穩向深潭莫貪餌

捕魚詞

明高啟

後網初沈前網起夫婦生來業淘水忽驚網重力難牽
打得長魚滿船喜不教持賣去南津且向江頭祭水神
願得年年神作主無事全家卧煙雨不論城中魚貴賤
換得酒歸儂不怨

清谿漁隱

明楊基

清谿秋來水如練歷歷魚蝦皆可見綠蓑酒醒雁初飛

風急蘆花吹滿面
谿南一帶是青山
逢著垂楊便可灣
漫道白鷗閒似我
漁舟更比白鷗閒

林志尹秋江漁父圖

明張以寧

江風搖柳雲冥冥
小艚釣歸潮滿汀
賣魚得錢共秋酌
白酒船頭青瓦瓶
樵青勸酒漁童舞
擊甌唱歌無曲譜
船前野鴨莫驚飛
我有竹弓不射汝

題漁樂圖

明王紱

遙天雨歇明殘霞
涼風颯颯吹蒹葭
晚來隨處可棲泊

五湖煙水皆吾家得魚且覓津橋酒旋採谿毛雜菱藕
除著沙鷗孰可親隔篷喚取鄰船叟生計年年一葉舟
全家不識別離愁婦能斫鱸兒行盍一笛橫吹萬里秋

漁父詞

明陳繼

江柳陰江水深釣船不到江之心江心風高浪相激縱
使魚多不易得釣絲只在江邊垂得魚無魚心自怡有
時投竿把書讀殘陽漸紅江轉綠有時沽酒醉風前沙
鷗忘機相對眠人生富貴那足羨好是春鴻與秋燕江

柳陰江水深釣船不到江之心

江鄉漁樂圖

明 劉 溥

桃花雨歇春潮長江中鯉魚隨水上香蒲葉短白鷺飛
漁父乘船自來往船頭巨罾三文餘轆轤引綆如引車
浪花觸船魚亂躍兒女相顧爭歡呼江頭賣魚朝買穀
晚來還向江頭宿老翁不愁兒不啼新婦船中炊欲熟

漁景

明 魯 鐸

桃李穠纖含曉濕蓬背晴曦曬蓑笠汀洲草芳鳬雁飛

江風撲岸炊煙急中湖布網却伊誰作力包羅意恐遲
春深欲勸同休息正是魚龍孕子時

笠澤漁父詞

明文彭

無利無名一老翁筆牀茶竈任西東陸魯望米南宮除
却先生便是儂

其二

吳淞江上是儂家每到秋來愛荻花眠未足日初斜起
坐船頭看落霞

其三

釣得鱸魚不賣錢
船頭吹火趁新鮮
樽有酒月將圓落
得今宵一醉眠

捕魚詞

明
吳夢暘

錢塘蕭蕭暮潮響
雪片打船天蒼莽
此時江心魚不上
漁郎視魚如在掌
身躍水底勝落網
手擎一尾一尺廣
回身落水水幾丈
俄頃出沒魚穰穰
起立船頭髮蔽顙
不著衣裳還打槳

五言律

獨釣

唐韓愈

侯家林館勝偶入得垂竿
曲樹行藤角平池散芡盤
羽沈知食駛緝細覺牽難
聊取夸兒女榆條繫從鞍

其二

獨往南塘上秋晨景氣醒
露排四岸草風約半池萍
鳥下見人寂魚來聞餌馨
所嗟無可召不得倒吾甌

垂釣亭

唐姚合

由釣起茅亭柴扉復竹楹波清見絲影坐久識魚情白
鳥依牕宿青蒲傍砌生欲同漁父舍須自減逢迎

春江獨釣

唐
戴叔倫

獨釣春江上春江引趣長斷煙棲草碧流水帶花香心
事同沙鳥浮生寄野航荷衣塵不染何用濯滄浪

夜到漁家

唐
張籍

漁家在江口潮水入柴扉行客欲投宿主人猶未歸竹
深邨路遠月出釣船稀遙見尋沙岸春風動草衣

和春深二十首

錄一

唐白居易

何處春深好
春深漁父家
松灣隨棹月
桃浦落船花
投餌移輕楫
牽輪轉小車
蕭蕭蘆葉裏
風起釣絲斜

漁父

唐杜牧

白髮滄浪上
全忘是與非
秋潭隨釣去
夜月叩船歸
煙影侵蘆岸
潮痕在竹扉
終年狎鷗鳥
來去且無機

宿漁家

唐劉威

竹屋清江上
風煙四五家
水園分芰葉
鄰界認蘆花
雨

到魚翻浪洲迴鳥傍沙月明何處去片片席帆斜

漁父

唐
李中

煙冷暮江濱高歌散誕身移舟過蓼岸待月正絲綸亦
與樵翁約同遊酒市春白頭雲水上不識獨醒人

谿叟

唐
僧景雲

谿翁居處靜谿鳥入門飛早起釣魚去夜深乘月歸露
香菰米熟煙煖荇絲肥瀟灑塵埃外扁舟一草衣

漁父吟

宋
宋伯仁

小舟如雁許穩穩下波心
蓑笠幾風雨江山無古今
清歌鳴短棹紅葉滿疎林
一醉不知世前路月未沈

漁隱為周仲明賦

元黃庚

一笠戴春雨扁舟寄此情
世間塵網密江上釣絲輕
不羨魚蝦利惟尋鷗鷺盟
嚴陵臺下水猶作漢時清

漁莊

元郭翼

山色桃花裏漁莊信少雙
鷗羣迴落日魚笥聚深
磴楊柳秋開屋蒹葭雨滿
江野翁歸醉晚水沒繫船
樁

夜到漁家

明
吳鼎芳

漁家近秋水水上槿扉開地寂月初到谿寒潮不來邨
沽惟白杜野坐只青苔為說芙蓉好明朝未可回

五言排律

釣竿篇

唐
沈佺期

朝日斂紅煙垂竿向綠川人疑天上坐魚似鏡中懸避
檝時驚透猜鉤每誤牽湍危不理轄潭靜欲留船釣玉
君徒尚徵金我未賢為看芳餌下貪得會無筌

六言律

秋漁

明楊慎

日出煙消露晞百丈清江釣磯船似天邊穩坐魚若空
行無依襖靄歌星獨往婆娑舞月方歸兆熊不夢渭叟
狎鷗久忘漢機

七言律

和慕容法曹尋漁者寄城中故人

唐錢起

孤煙一點綠谿湄
漁父幽居即舊基
飢鷺不驚收釣處
閒麝應乳負暄時
茅齋對雪開樽好
稚子焚枯飯客遲
勝事宛然懷抱裏
頃來新得謝公詩

西江上送漁父

唐
溫庭筠

却逐嚴光向若邪
釣輪茭掉寄年華
三秋細雨愁楓葉
一夜扁舟宿葦花
不見水雲應有夢
偶隨煙島便成家
白蘋風起樓船暮
江燕雙雙五兩斜

寄湘陰閻少府乞釣輪子

溫庭筠

釣輪形與月輪同獨繭和煙影似空若向三江逢雁信
莫辭千里寄漁翁蓬聲夜滴淞江雨菱葉秋傳鏡水風
終日垂釣還有意尺書多在錦鱗中

西塞山泊漁家

唐
皮日休

白綸巾下髮如絲靜倚楓根坐釣磯中婦桑邨挑葉去
小兒沙市買蓑歸雨來蓴菜流船滑春後鱸魚墜釣肥
西塞山前終日客隔波相羨盡依依

魯望以輪釣相示緬懷高致因作三篇

錄二

皮日休

角柄孤輪細膩輕
翠蓬十載伴君行
撚時解轉蟾蜍魄
拋處能啼絡緯聲
七里灘波喧一舍
五雲谿月靜三更
朱衣鮒足和蓑睡
誰信人間有利名

其二

盡日悠然舴艋輕
小輪聲細雨冥冥
三尋絲帶桐江爛
一寸鈎含笠澤腥
用近詹何傳釣法
收和范蠡養魚經
孤蓬半夜無餘事
應被嚴灘聒酒醒

頃自桐江得一釣車以襲美樂煙波之思因出

以為玩俄辱三篇復抒酬答錄一

唐

陸龜蒙

曾招漁侶下清潄獨繭初隨一錘深細輾煙華無轍跡
靜含風力有車音相呼野飯依芳草迭和山歌逗遠林
得失任渠但取樂不曾生箇是非心

贈彭蠡釣者

唐

杜荀鶴

偏坐漁舟出葦林葦花零落向秋深祇將波上鷗為侶

不把人間事繫心
傍岸歌來風欲起
卷絲眠去月初沈
若教我似君閒放
贏得湖山到老吟

戲贈漁家

杜荀鶴

見君生計羨君閒
求食求衣有底難
養一箔蠶供釣線
種千莖竹作漁竿
胡盧斟酌春醪酒
舴艋舟流夜漲灘
却笑儂家最辛苦
聽蟬鞭馬入長安

憶釣舟

唐
吳融

青山小隱枕潺湲
一葉垂綸幾汧沿
後浦春風隨興去

南塘秋雨有時眠，慣衝曉霧驚羣雁。
愛颭殘陽入亂煙，迴首無人寄惆悵。
九衢塵土困揚鞭。

釣翁

唐秦韜玉

一竿青竹老江隈，荷葉衣裳可自裁。
潭定靜懸絲影直，風高斜颭浪紋開。
朝携輕櫂穿雲去，暮背寒塘戴月回。
世上無窮嶮巇事，冥應難入釣船來。

贈漁者

唐胡曾

不愧人間萬戶侯，子孫相繼老扁舟。
往來南越諳鰲室。

生長東吳識蜃樓自為釣竿能遣悶不因萱草解銷憂
羨君獨得逃名趣身外無機任白頭

贈漁者

唐
韓偓

個儂居處近誅茅枳棘籬兼用荻梢盡日風扉從自掩
無人筒釣是誰拋城方四面牆陰直江濶中心水脈坳
我亦好閒求老伴莫嫌遷客且論交

贈漁翁

唐
韋莊

草衣荷笠鬢如霜自說家編楚水陽滿岸秋風吹枳橘

遶陂煙雨種菰蔣
蘆刀夜鱸紅鱗膩
木甌朝蒸紫芋香
曾向五湖期范蠡
爾來空闊久相忘

贈漁翁

唐羅隱

葉艇悠揚鶴髮垂
生涯空託一輪絲
是非不向眼前起
寒暑任從波上移
風養長歌秋月裏
夢和春雨晝眠時
逍遙此意誰人會
應有青山綠水知

釣車

唐徐寅

荻灣漁客巧粧成
碁鑄銀星一點輕
拋過碧江鸕鶿岸

軋為金井轆轤聲軸磨驛角冰光滑輪卷春絲水面平
把向嚴陵尋轍迹漁臺基在輶難傾

貽釣魚李處士

唐譚用之

罷吟鸚鵡草芊芊又泛鴛鴦水上天一棹冷涵楊柳雨
片帆香挂芰荷煙綠搖江澹萍離岸紅點雲疎橘滿川
何處邈將歸洞府數莖紅蓼一漁船

次韻南谿觀魚

宋韓駒

城西鼓枻又城東不待谿分上下風碧樹垂楊間黃綠

冰盤行鱸簇青紅橫塘日暮林巒合斷岸秋來浦溆通
安得此身無世界便隨漁艇入空濛

漁家

宋陸游

江上漁家水蘸扉閒雲片片傍苔磯釣收鷺下虛舟立
橋斷僧尋別徑歸海近岡巒多迤邐天寒霧雨正霏微
羊裘老作桐江叟點檢初心幸未違

次圭父觀漁韻

宋朱子

平生三伏斷追遊誰喚來穿澗樹幽初訝網橫天影破

忽驚人蹴浪花浮鳴榔不用齊吳榜鼓柁何須學楚謳
便有金盤堆白雪却鄰清泚向東流

漁父

金
李 節

舉世從誰話獨醒短蓑輕箬寄餘生半篙春水世塵遠
一笛晚風山雨晴稚乳滿船生事簡魚蝦到市利源輕
旁人莫怪機心少曾與滄洲白鳥盟

潮谿夜漁

元
柳 貫

谿水添流到石碕小家殘戶占漁商蛟龍未解乘雲氣

魚鼈安能避澤梁兩岸櫟林藏曲折一篝松火照微茫
淮夷固有蠙珠顆往往鉤深得夜光

漁蓑

元謝宗可

翠結香莎付釣舟一竿風雨不須愁苔磯夜泊披寒去
葦岸昏歸帶濕收月冷籠衣眠舵尾天晴隨網曬船頭
羊裘莫笑狂奴錯也著煙波萬頃秋

釣絲

謝宗可

臨流纖影衆鱗驚消得長縑一縷輕鉤墜亂縈春水碧

竿垂斜裊晚風清牽回江上煙波夢掣斷人間富貴情
我欲笑携千尺去桃花浪裏拔鯢鯨

潮谿夜漁

元
吳 萊

昨夜寒潮與此通荒谿尚趁百川東行依柏樹林頭月
釣拂蘆花嶼畔風挿竹侵沙魚尾短篝燈映草螭碣空
太公遠矣吾將隱赤鯉何書在腹中

題秋江把釣圖

元
黃鎮成

獨載輕舸過碧川一綸牽動楚江天蘆邊有月還吹笛

柳外無風不繫船
留火夜燃湘岸竹
得魚朝送酒家錢
十年湖海真如畫
亦欲狂歌一叩舷

漁邨

元錢惟善

丙穴魚來江盡頭
玄真卜築更深幽
對門燈火三家市
何處煙波萬里舟
明月竹枝揚子夜
西風木葉洞庭秋
棹歌一曲閒來往
指點儂家鸚鵡洲

竹榦青樂釣

明太祖

曠浦澄天濕曉煙
智人樂釣穩沙前
蓑輕雨霽雲收谷

釣擲綸樞水映船
舉棹欲歸江月上
掛帆已近暮霞邊
汀蘆處處飛螢火
照徹漁邨夜不眠

題煙波泛舟圖

明 劉基

舊遊憶鼓湘湖棹
日淨風微江練平
小艇曲穿花底出
游魚相伴鏡中行
別來漫想心徒切
畫裏重看眼亦明
素石蒼松是何處
願從巢父濯冠纓

吳淞漁樂

明 沈貞

家住滄洲白鳥邊
捕魚沽酒自年年
桃花浪暖堪垂釣

揚柳風輕不繫船
帆影帶歸孤嶼月
笛聲吹散一江煙
武陵亦是人間路
誰說仙家別有天

懷朱漁父

明 江仲魚

九谿深處似嚴灘
渺渺風塵白眼看
葉艇每隨幽嶂出
茅房孤掩落花殘
芙蓉衣上雲千片
楊柳谿頭月一竿
釣罷瓦餅曾共醉
滿身零露不知寒

峨谿晚釣

明 僧德祥

牛渚山前白鷺飛
船頭坐得便無機
鶯從柳絮風中聽

魚到桃花水後肥有夢只因懷太白逢人多說元暉
一壺春酒江邨暮泊在峨眉醉不歸

五言絕句

江行

唐錢起

岸綠野煙遠江紅斜照微撐開小漁艇應到月明歸

其二

曾有煙波客能歌西塞山落帆惟待月一釣紫菱灣

其三

江雨正霏微江邨晚渡稀何曾妨釣艇更待得魚歸

江邨夜泊

唐項斯

月落江路黑前邨人語稀幾家深樹裏一火夜漁歸

漁家

唐張喬

擁棹思悠悠更深泛積沅惟將一星火何處宿蘆洲

野釣

唐韓偓

細雨桃花水輕鷗逆浪飛風頭阻歸棹坐睡倚蓑衣

釣叟

唐杜荀鶴

茅屋深灣裏釣船橫竹門經營衣食外猶得美兒孫

江上漁者

宋 范仲淹

江上往來人但愛鱸魚美君看一葉舟出沒風波裏

漁艇

宋 朱子

出載長煙重歸裝片月輕千巖猿鶴友愁絕棹歌聲

谿邊釣船

元 牟 巖

莫出前谿去隨宜下釣鉤風波若不惡鱸鰕滿船頭

題漁舟風雨圖

元 吳 澄

蓑笠寒颼颼一篙背拳曲有人方醉眠酒醒失茅屋

淮南漁歌

元馬祖常

棹船淮水上曬網赤岸南船中捕來魚賣錢買魚籃

其二

小艇如鳬鷺湘東柴杉木載家復捕魚夜夜繫江竹

捕魚圖

元虞集

網罟日相從天寒澤國空釣竿長倚樹老却渭川翁

春江獨釣圖

元倪瓚

春洲菰蔣綠江水似空虛望山以高詠意釣不在魚

漁邨夕照

元陳旅

落日楚江深倒景在高樹曬網茅屋頭分魚石梁步

雜畫

明孫一元

盡日不見魚風高網罟冷蹋歌歸未歸江波蕩人影

網集潭

明施漸

朝向湖上去暮從湖上歸漁家自成市曬網及斜暉

平望夜泊

明王穉登

魚鱗成石量桑葉論斤賣珍重絲網難家家月中曬

六言絕句

漁隱圖詩為程子純賦

元杜本

山下白雲縹緲水邊紅樹依稀信有桃源深處漁人今
亦忘歸

漁

明黎擴

魚水心情淡淡鷗波身世悠悠清風楊柳一曲明月蘆
花滿洲

七言絕句

戲題湖上

唐
常建

湖上老人坐磯頭
湖裏桃花水却流
竹竿嫋嫋波無際
不知何者吞吾鉤

江邨即事

唐
司空曙

罷釣歸來不繫船
江邨月落正堪眠
縱然一夜風吹去
只在蘆花淺水邊

家園

唐
白居易

滄浪峽水子陵灘路遠江深欲去難何似家池通小院
卧房堦下插漁竿

贈漁父

唐
杜牧

蘆花深澤靜垂綸月夕煙朝幾十春自說孤舟寒水畔
不曾逢著獨醒人

懷歸

杜牧

塵埃終日滿窓前水態雲容思浩然爭得便歸湘浦去
却持竿上釣魚船

湖上

唐
許渾

彷彿欲當三五夕
萬蟾清雜亂泉紋
釣魚船上一尊酒
月出渡頭零落雲

守風淮陰

許渾

遙見江陰夜漁客
因思京口釣魚時
一潭明月萬株柳
自去自來人不知

薛氏池垂釣

唐
溫庭筠

池塘經雨更蒼蒼
萬點荷珠曉氣涼
朱瑤空嫵御溝水

錦鱗紅尾屬嚴光

寄裴生乞釣鉤

溫庭筠

一隨菱棹謁王侯
深媿移文負釣舟
今日太湖風色好
却將詩句乞魚鉤

沅江漁者

唐
李羣玉

倚棹汀洲沙日晚
江鮮野菜桃花飯
長歌一曲煙靄深
歸去滄浪綠波遠

釣魚

李羣玉

七尺青竿一丈絲
菰蒲葉裏逐風吹
幾回舉手拋芳餌
驚起沙灘水鴨兒

贈江上老人

唐

方干

潭底錦鱗多識釣
未投香餌即先知
欲教魚目無分別
須學揉藍染釣絲

漁父

唐

汪遵

棹月眠沄處處通
綠蓑葦帶混元風
靈均說盡孤高事
全與逍遙意不同

漁者

唐張喬

首戴圓荷髮不梳
葉舟為宅水為居
沙頭聚看人如市
釣得澄江一丈魚

阻風

唐韓偓

平生情趣羨漁師
此日煙江愜所思
肥鰕香粳小艫牒
早秋滋味阻風時

醉著

韓偓

萬里清江萬里天
一邨桑柘一邨煙
漁翁醉著無人喚

過午醒來雪滿船

江南

唐
陸龜蒙

便風船尾香杭熟
細雨罾頭赤鯉跳
待得江飡閒望足
日斜方動木蘭橈

自遣

陸龜蒙

甫里先生未白頭
酒旗猶可戰高樓
長鯨好鱸無因得
乞取餘艖作釣舟

其二

賢達垂竿小隱中
我來真作捕魚翁
前谿一夜春流急
已學嚴灘下釣筒

釣車

陸龜蒙

小輪輕線妙無雙
曾伴幽人酒一缸
洛客見時如有問
輾煙衝雨過桐江

淮上漁者

唐鄭谷

白頭波上白頭翁
家逐船移浦浦風
一尺鱸魚新釣得
兒孫吹火荻花中

釣叟

唐 杜荀鶴

田不曾耕地不鋤誰人閒散得如渠渠將底物為香餌
一度擡竿一箇魚

漁父

唐 李中

偶向蘆花深處行谿光山色晚來晴漁家開戶相迎接
稚子爭窺犬吠聲

其二

雪鬢蒼髯白布袍笑携頰鯉換邨醪慙慙留我宿谿上

釣艇歸來明月高

小兒垂釣

唐 胡幽貞

蓬頭稚子學垂綸
倒坐莓苔草映身
路人借問遙招手
恐畏魚驚不應人

漁者

宋 郭震

江柳弄風顰翠黛
山花著雨濕臙脂
却收短櫂拈長笛
一葉舟中仰面吹

南塘即事

宋 翁卷

半川寒日滿邨煙紅樹青林古岸邊漁子不知何處去
渚禽飛落拗罾船

舟行六絕句

錄一

宋張耒

渡頭風雨晚生寒蓑笠漁翁坐釣船為問篷中有魚否
一雙新鰕出籠鮮

過蓋竹作

宋朱子

浩蕩鷗盟久未寒征驂聊此駐江干何時買得漁船就
乞與人間畫裏看

田舍即事

宋 劉克莊

谿上漁郎占斷春
一川碧浪映紅雲
問渠定是神仙否
櫓去如飛語不聞

漁父詞

宋 方岳

陰陰深樹晚生煙
雨急歸來失繫船
白鷺不驚沙水淺
依然共在綠楊邊

煙谿獨釣圖

金 元好問

鞍馬風沙萬里身
眼明驚見楚江春
綠蓑衣底玄真子

不解吟詩亦可人

所見

金劉鐸

綸竿老子綠蓑衣
細雨斜風一釣磯
正是鄰家社醅熟
柳條穿得錦鱗歸

過唐州西李口

金邢安國

白沙翠竹谿上邨
漁翁賣魚喚行人
西風吹皺一谿水
水光日影金鱗鱗

江景

元黃庚

寒生雁背天將雪
冷入魚腮水欲冰
釣艇歸來江路暝
舟人分火點漁燈

雨過

黃庚

雨過山頭雲氣濕
潮生渡口岸痕深
一聲短笛斜陽外
知有漁舟泊柳陰

江鄉夜興

元尹廷高

極浦霜清雁打圍
漁燈明滅水煙微
天寒想是鱸魚少
犬吠空江船夜歸

谿上

元 劉秉忠

蘆花遠映釣舟行
漁笛時聞三兩聲
一陣西風吹雨散
夕陽猶在水邊明

即事

元 許有壬

幾家門繫釣魚船
一陣風香燎麥煙
畫出太平邨落景
酒旗多在綠楊邊

漁翁

元 周 權

轉櫂收緡日未西
短篷斜閣斷沙低
賣魚買酒歸來晚

風颭蘆花雪滿谿

題春江漁父圖

元 楊維禎

一片青天白鷺前
桃花水泛住家船
呼兒去換城中酒
新得搓頭縮頸鱗

綠陰垂釣

元 貢性之

茅屋人家隔薜蘿
綠陰窓戶晚涼多
日長借得南風便
時送滄浪一曲歌

釣魚圖

貢性之

谿樹蒼茫帶晚煙
谿流逆上似登天
歸來釣得鱸魚美
只博西窓一覺眠

題畫雜詩

元馬臻

數點寒鴉水遶邨
幾家茅屋掩柴門
白頭谿叟歸來晚
自把漁舟繫柳根

其二

采菱渡頭秋日晚
紅樓隔岸知誰家
參差遠樹雜雲氣
滅沒漁舟侵浪花

畫意

馬臻

江花江草映江樓
寫出江天一片秋
隔岸小橋低數尺
澹煙消處見漁舟

小汊

元僧圓至

麻骨燈明竹壁疎
更深人語在茅廬
開篷緣岸去沽酒
點火撥船來賣魚

絕句漫興

明劉基

五湖風雨夜垂綸
一葉扁舟一粟身
至竟雲濤歸大壑

煙波還屬釣魚人

題盛子昭臨吳興公谿山釣船圖

明
虞堪

著我春江聽雨眠
鷗波亭下水如天
當時度得參差玉
吹起春風滿釣船

春江漁父

明
陳繼

鬢絲如雪映沙鷗
煙渚風汀醉泊舟
好謝岸傍花共柳
莫將春色忌清秋

贈釣伴

明 陳憲章

短短萋萋淺淺灣
夕陽倒影對南山
大船鼓枻唱歌去
小艇得魚吹笛還

醉著

明 孫一元

瓦瓶倒盡醉難醒
獨抱漁竿卧晚汀
風露滿身呼不起
一江流水夢中聽

秋江釣者

明 潘德元

江湖最樂是漁翁
何地無天著釣篷
見慣白鷗渾不避

一絲晴颺蓼花風

漁邨夕照

明 沈明臣

不知誰唱白銅鞮
楊柳邨邊即大堤
款乃一聲風斷續
打魚人背夕陽西

桃谿

明 婁堅

迎潮小艇漉魚蝦
臨水居人引釣車
不怕桃源迷處所
潮回應帶樹頭花

鰕子禪

明 僧守仁

杖藜何處問鰕禪迴首胥邨鎖暮煙一曲漁歌秋浦外
腥風吹滿渡頭船

漁邨夜歸

明僧宗衍

月落蘋汀宿霧凝小橋霜冷掛魚罾歸來已是三更後
水際人家尚有燈

頌古詩

明僧普慈

每嗟船子慣垂綸恒泊谿邊荻映身人問不言頭自點
恐驚魚去不磨人

御定佩文齋詠物詩選卷二百二十八

欽定四庫全書薈要卷一萬八千八百五十一

集部

御定佩文齋詠物詩選卷二百二十九

牧類

五言古

牧童詞

唐
儲光義

不言牧田遠不道牧陂深
所念牛馴擾不亂牧童心
圓笠覆我首長蓑披我襟
方將憂暑雨亦以懼寒陰
大牛隱層坂小牛穿近林
同類相鼓舞觸物成謳吟
取樂須

史間寧問聲與音

牧童詞

元周權

我牧不憚遠牧多良苦辛所幸牧已狎馴擾無敗羣平
原濕春煙碧草何披紛大牛隱重坂小牛飲芳津旦出
露未晞及歸景尚曛時復叩角歌歌俚全吾真取樂田
野間世事非所聞歌闌卧牛背仰見天際雲

七言古

附長短句

牧童詞

唐李涉

朝牧牛牧牛下江曲夜牧牛牧牛邨口谷荷笠出林春
雨細蘆管卧吹沙草綠亂插蓬蒿箭滿腰不怕猛虎欺
黃犢

牧童

唐
僧隱巖

牧童見人俱不識盡著芒鞋帶蓑笠朝陽未出衆山時
露滴蓑衣猶半濕二月三月時平原草初綠三箇五箇
騎羸牛前邨後邨來放牧笛聲纔一舉衆稚齊歌舞看
看白日又西斜各自騎牛又歸去

書晁說之考牧圖後

宋 蘇軾

我昔在田間但知羊與牛
川平牛背穩如駕百斛舟
舟行無人岸自移我卧讀書牛不知
前有百尾羊聽我鞭聲如鼓鼙
我鞭不妄發視其後者而鞭之
澤中草木長草長病牛羊尋山跨坑谷
騰趲筋骨強煙蓑雨笠長林下
老去而今空見畫世間馬耳射東風
悔不長作多牛翁

牧牛兒

宋 張耒

牧牛兒遠陂牧遠陂牧牛芳草綠兒怒掉鞭牛不觸澗
邊柳古南風清麥深蔽目田野平烏犍礪角逐草行老
犢卧噉飢不鳴犢兒跳梁沒草去隔林應母時一聲老
翁念兒自携餉出門先上岡頭望日斜風雨濕蓑衣拍
手唱歌尋伴歸遠邨放牛風日薄近邨放牛泥水惡珠
璣燕趙兒不知兒生但知牛背樂

李唐春牧圖

元
任士林

春氣薰人未耕作江頭青青牛齒白牛飢草細隨意嚼

老翁曲膝睡亦著蓬頭不記笠拋却午樹當風夢搖落
夢裏牛繩猶在握昨夜囹頭牛食薄

牧童謠

明周是修

遠牧牛朝出東谿谿上頭谿頭草短牛不住直過水南
芳草洲脫衣渡水隨牛去黃蘆颯颯風和雨老鴉亂啼
野羊走絕谷無人驚四顧寒藤枯木暮山蒼同伴相呼
歸又忙石稜割脚茅割耳身上無有乾衣裳却思昨日
西邊好曠坂平原盡豐草短蓑一卧午風輕長笛三吹

夕陽早

五言律

牧童

唐
僧栖蟾

牛得自由騎
春風細雨飛
青山青草裏
一笠一蓑衣
日出唱歌去
月明撫掌歸
何人得似爾
無是亦無非

牧

明
張居正

是處桑麻好
田家樂事同
耕夫閒白晝
牧豎趣春風
短笛雲山外
長林雨露中
命儔還藉草
相與說年豐

六言律

夏牧

明楊慎

長夏冷風清朗新晴丹帔綠疇山高羊羣似蟻水濶牛
背如舟半幅生煙冪冪三腔短笛悠悠柴扉歸來早掩
斜陽影在檐頭

七言律

牧

明朱之蕃

擇地求芻兩得宜欣看茁壯望蕃孳薰風永晝蓑堪枕

殘日荒邛笛任吹海上平津封已晚
害中屬國節空奇
長原淺草清流繞倒跨徐歸信犢兒

五言絕句

牧童

唐
劉駕

牧童見客拜山果懷中落晝日驅牛歸
前谿風雨惡

牧豎

唐
崔道融

牧豎持蓑笠逢人氣傲然卧牛吹短笛
耕却傍谿田

六言絕句

牧

明
黎擴

芳草茸茸煖碧烏犍濕濕春肥滿
蓑煙雨朝出一笛斜陽暮歸

七言絕句

牧童

唐
盧肇

誰人得似牧童心
牛背橫眠秋興深
時復往來吹一曲
何愁南北不知音

題牧牛圖

元
黃清老

平原雨多煙草浮牧童驅牛如挽舟柴門正在水深處
青山流過屋西頭

題牧牛圖

元僧行端

誰家荒疇連平原何處孤邨帶喬木官田耕盡牛正閒
且對東風弄橫玉

牧牛

明王錫爵

壠上歸來跨犂行揚鞭遙指暮雲生明朝共把春犁去
聞道君王欲省耕

平原道中見牧豕者

明尹嘉賓

天門室宿鬱如虹
海上蕭條牧豕翁
會得平津開閣意
一竿寒日野田中

御定佩文齋詠物詩選卷二百二十九

欽定四庫全書薈要卷一萬八千八百五十二

集部

御定佩文齋詠物詩選卷二百三十

織類

五言古

子夜夏歌

晉樂府

春傾桑葉盡夏開蠶務畢晝夜理機絲知欲早成匹

作蠶絲

晉闕名

素絲非常質屈折成綺羅敢辭機杼勞但恐花色多

詠中婦織流黃

梁簡文帝

翻花滿堦砌愁人獨上機
浮雲西北起孔雀東南飛
調絲時繞腕易鑷乍牽衣
鳴梭逐動釧紅粧映落暉

與司馬治書同聞鄰婦夜織

梁王僧孺

洞房風已激長廊月復清
藹藹夜庭廣飄飄曉帳輕
雜聞百蟲思偏傷一鳥聲
鳥聲長不息妾心復何極
猶恐君無衣夜夜當牕織

見人織聊為之詠

梁劉邈

纖纖運玉指脈脈正蛾眉振躡開交縷停梭續斷絲
花照初月洞口垂朱帷弄機行掩淚翻令織素遲

中婦織流黃

唐虞世南

寒閨織素錦含怨斂雙蛾綜新交縷澀經脆斷絲多
衣香逐舉袖釧動應鳴梭還恐裁縫罷無信達交河

織女詞

唐孟郊

夫是田中郎妾是田中女當年嫁得君為君秉機杼
筋力日已疲不息牕下機如何織紉素自著藍縷衣
官家

勝邨路更索栽桑樹

古詞

唐
施肩吾

夜栽鴛鴦綺朝織蒲桃綾欲試一寸心待縫三尺冰

邨舍雜書

宋
陸游

中春農在野蠶事亦隨作手種臨安青可飼蠶百箔累
累繭滿簇繹繹絲上篋老子雖安眠衣帛可無忤

題耕織圖

元
趙孟頫

三月

三月蠶始生纖細如牛毛婉孌閨中女素手握金刀切
葉以飼之擁紙散周遭庭樹鳴黃鳥發聲和且嬌蠶飢
當採桑何暇事遊遨田時人力少丈夫方種苗相將挽
長條盈筐不終朝數口望無寒敢辭終歲勞

五月

五月夏以半谷鶯先弄晨老蠶成雪繭吐絲亂紛紜伐
葦作曲薄束縛齊榛黃者黃如金白者白如銀爛然
滿筐莒愛此顏色新欣欣舉家喜稍慰經時勤有客過

相問笑聲聞四鄰論功何所歸再拜謝蠶神

六月

釜下燒桑柴取繭投釜中纖纖女兒手抽絲疾如風田
家五六月綠樹陰相蒙但聞繰車響遠接邨西東旬日
可經絹弗憂杼軸空婦人能蠶桑家道當不窮更望時
雨足二麥亦稍豐酤酒田家飲醉倒嫗與翁

七月

七月暑尚熾長日弄機杼頭蓬不暇梳揮手汗如雨嚶

嚶時鳥鳴灼灼紅榴吐何心娛耳目往來忘偃僂織為
機中素老幼要紉補青燈照夜梭蟋蟀窓外語辛勤亦
何有身體衣幾縷嫁為田家婦終歲服勞苦

七言古

賦得婀娜當軒織

唐蕭詮

東南初日照秦樓西北織婦正嬌羞綺窓猶垂翡翠幌
珠簾半上珊瑚鈎新粧入機映春牖弄杼鳴梭挑織手
何曾織素讓新人不掩流蘇推中婦三日五疋未言遲

衫長腕弱繞青絲綾中轉躡成離鵲錦上迴文作別詩
不惜紈素同霜雪更傷秋扇篋中辭

織錦詞

唐 溫庭筠

丁東細漏侵瓊瑟影轉高梧月初出簇簌金梭萬縷紅
鴛鴦艷錦初成匹錦中百結皆同心蕊亂雲盤相間深
此意欲傳傳不得玫瑰作柱朱絃琴為君裁破合歡被
星斗迢迢共千里象尺熏爐未覺秋碧池已有新蓮子

染絲上春機

唐 李賀

玉罌汲水桐花井
簾絲沉水如雲影
美人嬾態臙脂愁
春梭拋擲鳴高樓
綵線結茸背復疊
白袷王郎寄桃葉
為君挑鸞作腰綬
願君處處宜春雪

綵絲行

宋 范成大

小麥青青大麥黃
原頭日出天色涼
姑婦相呼有忙事
舍後煮繭門前香
綵車嘈嘈似風雨
繭厚絲長無斷縷
今年那暇織綃著
明日西門賣絲去

流黃引

元 宋 棗

桂庭月午啼蛩閒鸞宮露下水紈單酥燈毳帳雁門塞
妾心料此中閨寒沍黃縮澀微含潤錦石鋪雲瑩相襯
細腰杵急夜如年擣碎商飈不知困春纖易製添光澤
鳳花入眼波紋溢東天皜皜呼侍兒快取衣箱金粟尺

寒機女詞

元王逢

鴛鴦機滿東西舍雪繭繰來日相射世俗競染紅藍花
妾心鍾愛金絲柘君王錦繡焚殿前天孫鳳梭蛛網懸
織成雲霧製龍袞萬一熏香分御筵

五言律

蠶室成

明
皇甫汈

蠶館開周典，鸞輿扈漢儀。
棘牆春窈窕，桑泊晝連蜷。
蠶獻夫人日，衣明上帝時。
娥媯御王母，玉佩降瑤池。

五言排律

鮫人潛織

唐
薛能

珠館馮夷室，靈鮫信所潛。
幽閒雲碧牖，滉漾水晶簾。
機動龍梭躍，絲繁藕綵添。
七襄牛女恨，三日大人嫌。
透手

擎吳練凝冰笑越縑無因聽札札空想濯纖纖

七言律

織錦女

唐秦韜玉

挑花日日覓新奇有鏡何曾及畫眉祇恐輕梭難作匹
豈辭織手徧生胝合蟬巧間雙盤帶聯雁斜銜小折枝
豪貴大堆酬曲徹誰知辛苦一絲絲

題張萱美人織錦圖為慈谿蔡元起賦

元

納新

織錦秦川窈窕娘
新翻花樣學宮坊
窓虛轉軸鶯聲滑
腕倦停梭粉汗香
雙鳳迴翔金縷細
五雲飛動綵絲長
明年夫壻封侯日
裁得宮袍遠寄將

織錦機

明瞿佑

綠紗窓下響咿啞
知是秦川第幾家
五色染成長命縷
雙頭挽就合歡花
只愁轉軸勞筋力
莫謾投梭損齒牙
不似繡牀閒坐倦
自將辛苦作生涯

五言絕句

續古

唐陳陶

嬋娟越機裏織得雙棲鳳慰此殊世花金梭忽停弄

其二

景龍臨太極五鳳當庭舞誰信壁間梭升天作雲雨

浣紗女

唐僧皎然

清淺白沙灘綠蒲尚堪把家住水東西浣紗明月下

織錦圖

元楊維禎

秋深未寄衣絡緯上寒機斷織曾相戒夫君不用歸

七言絕句

江南織綾詞

唐
施肩吾

卿卿買得越人絲
貪弄金梭嬾畫眉
女伴能來看新纂
鴛鴦正欲上花枝

冬日田園雜興

宋
范成大

邛巷冬年見俗情
鄰翁講禮拜柴荆
長衫布縷如霜雪
云是家機自織成

織婦

宋
謝翱

待得蠶蠶繭上絲織成送女去還歸支機本是寒砧石
留取秋深自搗衣

西湖竹枝詞

元顧瑛

陌上採桑桑葉稀家中看蠶怕蠶饑大姑要織迴文錦
小姑要織嫁時衣

過邨家

明樊阜

細莎邨路繞山斜澗水西頭一兩家桑柘葉乾鳩雨歇
茅檐索索響縑車

貧女吟

明 余育

舊絲織盡復新絲
辛苦終朝不下機
祇恐與時花樣別
不堪裁作嫁人衣

蘇蕙

明 梁辰魚

淚痕點滴錦花浮
幾載拋梭織未休
願得璇圖似夫壻
殘絲斷處認回頭

竹枝詞

明 王叔承

青桑老盡茜花開
新婦看蠶婆不來
織得西川宮樣錦

機頭先與小姑裁

御定佩文齋詠物詩選卷二百三十

欽定四庫全書薈要卷一萬八千八百五十三

集部

御定佩文齋詠物詩選卷二百三十一

女紅類

五言古

子夜夏歌

晉

樂府

田蠶事已畢思婦猶苦身當暑理絺服持寄與行人

詠剪綵花

梁

劉孝威

葉舒非漸大花發是初開無論人訝似蜂見也爭來

詠剪綵花

梁朱超道

淺深依樹色舒卷聽人裁
假令春已度終佳手中開

子夜冬歌

唐崔國輔

寂寥抱寒心裁羅文褰褰夜
久頻挑燈霜寒剪刀冷

子夜吳聲四時歌

元張憲

瓦上松雪落燈前夜有聲
起持白玉尺呵手製吳綾
細紉征袍縫邊庭草又青

七言古

白紵詞

唐
張籍

皎皎白紵白且鮮將作春衣稱少年裁縫長短不能定
自持刀尺向姑前復恐蘭膏汙纖指常遣傍人收墮珥
衣裳著時寒食下還把玉鞭鞭白馬

裁衣曲

元
陳基

殷勤織紵綺寸寸成文理裁作遠人衣縫紉不敢遲裁
衣不怕剪刀寒寄遠惟憂行路難臨裁更憶身長短只
恐邊城衣帶緩銀燈照壁忽垂花萬一衣成人到家

美人熨帛圖

明 劉溥

霜帛丁東搗初歇女伴相憐白如雪掩帷下堂同此情
白腕對曳當中庭中庭無風乾未得銅斗自燒還自熨
只愁熨著有焦暈難表此身如此白小鬟莫更蹲復蹲
猶恐皺却葵花紋

五言律

剪綵

唐 張九齡

姹女矜容色為花不讓春既爭芳意早誰待物華真葉

作參差發枝從點綴新自然無限態長在艷陽晨

七言律

剪刀

唐
徐鉉

寶持多用繡為囊雙目交加兩鬢霜金匣掠平花翡翠
綠窓裁破錦鴛鴦初裁連理枝猶短誤綰同心帶不長
欲製溫袍先把看質非紈綺媿銛鉞

監繡

元
揭祐民

鳳閣龍庭慶自今羽鱗顏色組絲深美人百巧天孫手

才士一生紅女心願化神蠶抽甕繭用將縲籍入瑤林
讀書補報渾無力慚媿臨機惜寸陰

剪刀

明瞿佑

巧製工夫百鍊鋼持來閨閣共行藏雙環對展魚腸快
兩股齊開燕尾張針線有功憑制造綺羅無價任裁量
隨機鏤出新花樣長在佳人玉指傍

五言絕句

春夜裁縫

唐薛維翰

珠箔因風起飛蛾入最能不教人夜作方便殺明燈

無題

明
袁 凱

春衣裁剪罷密葉間穠花縫到鴛鴦處行行線脚斜

七言絕句

寒閨思

唐
白居易

寒月沈沈洞房靜真珠簾外梧桐影秋霜欲下手先知
燈底裁縫剪刀冷

題針限羹字韻

宋
裘萬頃

一寸堅鋼鐵琢成綺羅叢裏度平生有時稚子敲成釣
釣得魚兒便作羹

春詞

元 胡天游

綠窓紅燭製春衣宮樣花紗要入時玉手怕裁雙鳳破
并刀欲下更遲遲

理繡

元 楊維禎

揀得金針出象筒鴛鴦雙刺扇羅中却嗔昨夜狸奴惡
抓亂金牀五色絨

宮中詞

元張昱

延華閣下日如年
除是當番到御前
尋出塗金香墜子
安排衣線撚春綿

題月下裁衣圖

明陳繼

香幃風卷月團團
睡起裁衣思萬端
秋葉未紅金剪冷
玉門關外不勝寒


宮詞

明俞允文

一承恩澤入蓬萊
別賜輕綃稱體裁
剪得辟邪新繭子

並房宮女闈看來

御定佩文齋詠物詩選卷二百三十一



總校官庶吉士臣侍朝

校對官編修臣許兆椿

謄錄監生臣徐繩玉